



Jumat, 06 Desember 2024
Ogen: Maleakhi 3:16-18



"Bapa Si Melias"



Ogen bas Paksa Tenengta wari enda, "*Ia nge **jadi bangsangKu**, nina Tuhan si mada Kuasa. Tupung warina Aku nehken perbahanenKu, ia me **si jadi si kerajangenKu. Melias** Aku man bana bali ras liasna ate sekalak bapa man anakna **si patuh man bana**" (ay.17). Kalimat enda ibelasken Tuhan nandangi bangsaNa, bangsa si kin ndube nilah dengen la patuh man Tuhan; bangsa si kin ndube mpedarat cakap si la uli kerna Tuhan (banci ka ioge ayat si lebena); bangsa si megati mberontak erkiteken la bagi sura-surana si jadi. Amin bage gia perbahanen bangsa e kempak Tuhan, tapi lias ateNa la pernah nadingken bangsa pilihanNa, iandingken bas ayat 17 bagi perlias ate bapa man anak si patuh man bana. Keleng ate Tuhan nandangi bangsaNa i gambarken bagi sekalak bapa si melias ;mereken si mehulina man anak-anakna.*

Piga-piga kata si itebalken bas ayat 17 enda me nuate jadi renungen man banta kerina Moria. Si pemena e me jadi bangsangKu. Tuhan negasken man bangsa e mulihi maka aminna gia perbahanen bangsa e la mehuli tapi Tuhan tetap ngatakan maka bangsa si mekeng e jadi bangsaNa; si peduaken jadi sikerajangenku. Kata enda negasken maka bangsa e, e me kap Tuhan si mada dengen Tuhan si nandaisa; si peteluken melias. Perkuah ate Tuhan i cidahkenNa alu tetap engkelengi bangsa e; sipemampatkan sipatuh man bana. Kekelengen Tuhan e jadi bagin si kerajangen bangsa pilihan, adina bangsa pilihan e patuh man baNa. Kepatuhen bangsa pilihan man Tuhan mabai bangsa e ndatken kejuah-juahen bage pe keselamatan. Kita e me bangsa pilihan Tuhan, si keleng ateNa. Tuhan selaku Bapa si melias tetap nge encidahken kerna keleng ateNa man banta, emaka marilah kita tetap patuh ras ngikutken undang-undang Tuhan gelah kita banci ngaloken keleng ate Tuhan, bage sekalak bapa si melias.